

明  
詩  
紀  
事

明詩紀事

貴陽陳田輯

庚籤

鄭學醇 一首

學醇字承孟廣州順德人隆慶丁卯舉人官武緣知

縣有句漏集

廣東詩粹張羽王云武緣詩其氣溫其思密其辭俊以麗

贈隱者詩

東林富麋鹿下有靜者廬垂蘿蔭檐隙落葉紛前除  
晝時曳踵玄晏恆著書何必方外逃始與塵事疏

梁紹震 一首

紹震字原東廣州順德人隆慶丁卯舉人官平樂同知有緒昌堂集

元日

風高千戶曉雲靜九天開把酒聊隨俗占年一上臺野梅催  
歲色檐鳥喚春來坐看江潭父得魚吹笛回

黃鳳翔

六首

鳳翔字鳴周晉江人隆慶戊辰第二人及第授編修  
進修撰歷中允諭德進祭酒擢禮部侍郎疏建儲不  
報乞休歸起故官改吏部遷南禮部尙書天啟初謚  
文簡有田亭草

田按文簡立朝不附和江陵又疏建儲不報乞歸有  
恬退之風五言詩清警拔俗稱其爲人

謁于少保祠

白登園不解六飛去不返社稷幸有君臣節惟蹇蹇九鼎奠  
如山邊塵淨若捲漢皇有神靈碧然乾樞轉安得延陵讓用  
竟呂甥款南宮蟄龍奮自恨一死晚蒼穹蹶黷變旁觀爲涕  
泣嗣皇賜昭雪廟貌寄崇巘臣忠主亦聖遺風百世遠

鄭方坤全閩詩話黃公鳳翔吳夢記云萬厯己丑冬  
至前二日余以叨貳春省將祇事郊壇齋宿署中是  
夜與僚長東阿于公富順李公擁榻立談宵分乃罷  
既就枕忽夢有投刺者曰于尙書使也開函睇視弗  
覩名姓刺中有二語云空山一淚惡誰寄萬古孤雲  
祇自愁心自駭愕通夕不寐晨起具述以告二公子  
公訝曰所謂于尙書者非眼中人耶少選浙江上奏  
掾來呈副封則巡撫傅某所題疏也略曰伏覩故少  
保兵部尙書臣于謙當睿皇北狩景帝嗣統內修外  
攘盡瘁謁誠俾九鼎危而獲安鑒輅去而復返忠甚  
盛也遺妻非之譏竟死非辜睿皇旋覆悔之聖聖相  
承先後昭雪贈官賜諡建祠吳山恩華備矣惟時秉

事者弗克將順德意易名肅愍未愜眾心乞聖明裁  
改以彰顯勸慰幽魂于公覽疏顧謂予曰夢徵矣幽  
明感通一至是乎願少保公獨見夢於公何也蓋予  
嘗陟吳山之陽謁少保祠爲詩弔焉良謂有一面之  
識乃爲二公誦予詩有生聖臣忠語于公嘆曰公爲  
少保公知已矣比疏下于公請改謚曰忠肅天子俞  
之於是與論稱愜謂足安少保公九京云

### 山中寒食

介推不言祿遠作龍蛇蟄山林雖被焚一去周八極此身豈  
飽繫死向灰中匿太原人何癡千載悲寒食

### 聽月樓示玄道人

西來音可觀層樓月可聽耳目非易用靈根洞相應受想屬  
虛空萬緣寂俱定馴馴是聞法收視乃見性窈窈樓中居日  
覺丹臺淨六鑿爾都捐無得亦無証何用強分解嘒嘒問佛

姓

思舊吟 二首

瑕邱夙傳業摘詞亦擅名譚諧似方朔而不登漢廷家無種  
秫田當墟買宿醒吟社時酣唱刻燭四韻成何煩手推敲一  
座爲盡傾壯懷老偏豪隕矣處土星

江山人一鯉

早歲曾夢筆藝苑知名久一自結同聲視我忘年友宦遊咏  
宣城退居吟五柳側耳何鏗鏘寄贈亦瓊玖蘭亭有唱和魁  
然爲祭酒郢匠當我前拙工宜縮手遺札猶在几先生今烏  
有

江太僕萬仞

山中讀南華

木以不材壽雁以不鳴死誰謂莊生達怔營猶爾爾世罕百

年人逝如東流水材與不材間相去能有幾鳬雁羈稻梁山  
檣依畏鼎邱壑堪藏身榮祿禍所倚悠然濮水釣涂中自曳  
尾莊生豈不材韜真以沒齒

王家屏

一首

家屏字忠伯大同山陰人隆慶戊辰進士選庶吉士  
授編修進修撰歷侍講學士擢禮部侍郎改吏部兼  
東閣大學士入預機務進禮部尚書太子少保贈少  
保諡文端再贈太保有詩集二卷

田按文皇四駿圖詩四篇在張太岳集中而詩綜據  
館課集本屬之文端余檢文端詩集亦無此四詩則  
自館課集之訛未可援以爲據也文端立朝不阿奏  
疏侃侃直言有古大臣風詩多酬應之作非其所長

送劉太史秦藩便道省覲

綠鬢神仙侶青雲侍從臣  
校藝依日月捧節下星辰  
桐葉遙分陝皇華近使秦  
褰帷瞻華嶽飛旆度河濱  
宴設新豐酒花明灞澹春  
趨庭紆畫錦里閨溢光塵

陳于陞一首

于陞字元忠南充人隆慶戊辰進士選庶吉士授編修  
歷侍講學士拜禮部侍郎改吏部進禮部尚書兼  
東閣大學士入參機務加太子少保文淵大學士進  
太子太保贈少保謚文憲有萬卷樓稿

田按文憲集罕見余從劍閣芳華集錄詩一首

華山紀遊

名山縹緲闕靈蹤  
路入金霄瑞氣封  
箭括通天青一徑  
蓮花



拔地翠千重日華東映標仙掌山勢西來帶雪峯欲馭長風  
理瑤策更攜三秀跨茅龍

張位一首

位字名成新建人隆慶戊辰進士選庶吉士授編修  
遷侍講改授南司業謫徐州同知擢南尚寶丞召爲  
左中允進祭酒擢禮部侍郎改吏部兼東閣大學士  
入參機務進禮部尚書文淵閣大學士加太子太保  
再進少保吏部尚書武英殿大學士奪職閒住尋除  
名爲民遇赦不宥天啟中復官贈太保諡文莊有閒  
雲館集鈔六卷

柳志居詩話文莊以持正忤江陵詩頗有憂危之語  
其詠射鵠云方寸能幾何當此亂鏃投有感其言之

也既罷相於東湖杏花村建閒雲樓吟眺自娛晚探  
青原之勝汎舟螺川野服徒車登覽竟日老僧不識  
爲宰相題詩懷鄒魯瞻門人胡廷宴守吉安從寺壁  
見詩始知之是亦佳話  
田按新建以遼事敗奪職除名爲民明之存亡在此  
一舉天啟中乃復官子諡所謂亂朝之政不可以究  
詰也

### 宿化城寺

峭磴疑無路靈源別有天暮煙籠合嶂春水漫平田  
境僻少塵事山空清客眠外韜含內美此地得眞詮

沈一貫

八首

一貫字肩吾鄞人隆慶戊辰進士選庶吉士授檢討  
歷中允侍讀學士擢吏部侍郎加太子賓客進南禮  
部尙書改北兼東閣大學士入預機務進太子太保

戶部尚書武英殿大學士累加少傅兼太子太傅吏部尚書建極殿大學士贈太傅諡文恭有喙鳴集十

### 八卷

列朝詩集戊辰史館大拜者七人以詞章擅名者東阿鄆縣鄆縣之才筆秀於東阿田按鄆縣相業不足言少師事沈明臣稱為句章公又與黎惟敬歐楨伯輩往還故詩筆頗擅麗藻

### 山陰道中

最是山陰道可憐青蒲白鳥浴晴川一奩水鏡疑無地九疊山屏直上天向浦歌聲春社鼓隔江燈影夜漁船誰能乞得君王賜不戴黃冠已是僊

### 送黎惟敬歸嶺南

蘭舟桂楫恨悠悠海北天南自此休梅子雨時過庾嶺桃榔

夢裏到番州不知茗碗同誰坐  
定有花燈入夜遊應恨塞鴻  
飛不去萬山回合一羅浮

送歐楨伯之南都

水部移官向舊京似將明月共南行  
青門楊柳辭賓御白下  
風雲待主盟詩爲三山憐客老  
酒因羣俊覺杯輕六朝遺事  
何須問苑柳宮花日夜生

河南懷古

曾向齊門歌二桃因從帝子說三刀  
兩朝涕泣吹餘燼五月  
踰躑渡不毛鼎足已知天意定  
江心猶隱陣雲高河南祠廟  
終今古蛇虎蹤橫護六韜

寄內

暮雲天遠桂樓深二月韶華半有陰鳳宇時來空宛轉魚書  
何處付浮沈銅缸月掩三更夢寶篆煙消五夜心最恨吳娃  
舊歌曲朝朝暮暮起江尋

寶劍

赤堇山開不可鑪若耶溪竭有銅無城璫珠玉終難見白日  
燕山狎狗屠

蹴鞠

小桃微雨夜來香朝入雞坊暮狗房無賴楊花偏解妬團風  
先占打毬場

聽琵琶

天關直北是居庸夜半期門紫翠重遂有春聲傳樂府琵琶

宛轉唱黃龍

鄭汝璧 三首

汝璧字邦章縉雲人隆慶戊辰進上授刑部主事歷  
員外郎中改禮部吏部遷太常少卿出爲福建參議  
歷廣東副使河南參政山東布政使以僉都御史巡  
撫山東改延綏進兵部侍郎總督宣大有由庚堂集

愚谷雜詠 二首

委巷稀塵映城居似遠村菱荷衣乍製松菊徑猶存晦跡從  
牛僧閒情共鳥言平生饒野趣樂志仲長園  
卜築家山半雙峯對草堂巖欹斜引磴松磯別開跡留客呼  
浮白逢僧學坐忘陸沈徒復爾廣莫是吾鄉

蔡文範 三首

文範字伯華瑞州新昌人隆慶戊辰進士除刑部主事遷兵部郎中出爲湖廣提學  
進廣東參議有

縉雲齋稿甘露堂集

靜志居詩話青門近體雄渾絕倫

自瀛德趨東昌道中雜言 三首

風壤連齊魯河流匯衛漳愁思斜日外衰髯驛亭旁江鷺淩  
寒浴飢鳥下食將頻來舟楫上憂患飽經營

碣石銜天府清漳解北流星槎天上使簫鼓驛邊舟岸柳紆  
行旆州兵護彩旂還聞元夕近燈檠自南州

振柁憐三老開船禱石尤睨陽空日照陰溝未全收得食鰥

驚嘯經時枳橘秋孤舟且飄泊意道任悠悠

朱孟震

十二首

孟震字秉器新淦人隆慶戊辰進士除南刑部主事  
歷郎中出知重慶府歷陝西山西副使四川按察使  
貴州布政使入爲順天府尹以右副都御史巡撫山  
西有郁木生全集

四庫總目孟震詩首節諧暢而意境不深

吳國倫頗頗洞續稿秉器詩諸體錯陳爛然有第高  
不至詭異卑不至儕俗

張九一綠波樓集秉器詩爾雅深厚

靜志居詩話秉器律律以詩家自許其在南曹結青  
溪社一時名士聲應氣求所緝緒談餘談述先誌之  
舊聞綜同人之麗句可謂好事也已  
田按秉器詩首節瀏亮選詞雋雅與張助甫品格相  
似



立武湖

立武湖頭春可憐  
遠隄花柳媚遙天  
風微鳬鷺參差下  
日麗樓臺紫翠連  
龍氣深秋晴似雨  
馬蹏芳草煖浮煙  
白雲自是神仙署  
誰道蓬萊弱水邊

莫愁湖小集呈汪仲嘉諸君子

莫愁湖上雲氣開  
蓮花雙槳蕩舟來  
盧家歌塵久寂寞  
石城山色今崔嵬  
詞客千秋飛翰墨  
王孫此地有樓臺  
清時文酒能高會  
落日孤懷轉壯哉

讀留侯傳

帷幄全收佐命功  
帝師原自有仙風  
拂衣未棄人間事  
進履先逢圯上公  
一劍夜寒芒燭澤  
五雲秋老未央宮  
到來鍾室

嗟何晚美爾深藏異日弓

習家池

斜日城南興不孤習池風景倍踟躕誰爲馬上狂山簡我自  
高陽舊酒徒三峴東雲迷遠樹半江寒月澹平蕪何人更唱  
銅鞮曲千古能消一醉無

漳河懷古

漠漠平沙送客襟乾坤雄峙昔年心春風銅雀有興廢斜日  
清漳無古今七子才名空寂寞三分霸氣總銷沈人間何處  
征西墓凍草寒雲結恨深

大佛巖午憩

大佛巖懸一百尺江濤東下湧驚飈舟航白日雷霆鬬竹樹

青天霧雨騎衲子誦經龍竊聽使君回轡鶴相邀蒲團小坐  
茶煙午那能塵襟不盡銷

蜀忠武侯祠

流水無聲繞薜蘿三分籌策竟如何南陽龍去英雄盡西蜀  
鵲颺風雨多雲鳥縱橫魚復浦星辰搖動錦江波千秋涕泗  
秦州表白日精靈更不磨

秋日金沙寺贈珠上人

萬里橋東覺路偏層樓閒傍蔚藍天閒雲幽鳥爾何意翠竹  
黃花最可憐人去問奇空有字寺有楊升菴碑中多奇字客來聞梵欲忘  
筌出門相送蒼煙暮卻對溪流一灑然

龍門賓陽洞寄謝李使君

賓陽洞前伊水長  
楚客炎夏來徜徉  
岩巒只去天尺五  
闌檻宛在水中央  
使君別意誰深淺  
遊子歸心正渺茫  
今日龍門還御李  
不禁清興劇飛觴

寄懷歐楨伯

水曹曾聽秣陵鐘  
聞說官梅寄興濃  
書到遙憐玄草色  
詩題偏問浣花蹤  
舊遊待詔三千牘  
新卜羅浮第幾峯  
漂泊故人還吏隱  
冥鴻霄漢杳難從

春興

含笑桃花作態新  
綰情楊柳弄眉頻  
那能不醉雲安酒  
春色憐人似故人

桃葉渡

桃葉渡前芳草迷綠槐高柳岸東西停舟日暮行人盡流水  
一灣鶯亂啼

龔勉二首

勉字子勤無錫人隆慶戊辰進士除嘉興知縣改吳  
橋遷南刑部主事改戶部歷員外郎中出爲嘉興知  
府遷浙江參政進本省按察使改山東遷浙江布政  
使有尙友堂集

弇州山人續稿子勤古體於左司近體於香山當其得意匪甲而乙不至相徑庭

贈丁隱居

雲卧吳門客脩然遠俗情才高文寡和身隱道先成白髮窮  
莊叟青山老伏生幽棲求大藥遠思託蓬瀛

元日同仲山王先生過蒙泉莊先生書屋

舊圃開新往方塘一檻清  
草玄亭始就問字坐常盈  
遶屋青山色到門流水聲  
慚余時造席鼓瑟似侯生

習孔教一首

孔教字時甫廬陵人隆慶戊辰進士選庶吉士授

歷官南吏部侍郎

恭陪北郊禮成有紀

良辰屬朱明祠官肅方澤  
天子禮皇祇羣工助精白  
景風應函鍾高燎揚廣陌  
上公秉黃琬太史奉素冊  
六變樂初成萬靈馨具格  
熙朝重殷典微臣叨服役  
趨跽從黝牲舞蹈依紺席  
始待空桑鳴終裸白茅藉  
展采偕有司齋心保無斁  
資生

荷弘載美報感疇昔虞類合園丘周裡分泰圻今古殊儀文  
恪恭自朝夕汾陰空樓船雍時已陳迹納履下紫壇稅冕蔭  
蒼柏賦擬獻甘泉才應執爨蹠

劉應麒一首

應麒字道徵郡陽人隆慶戊辰進士選庶吉士改禮  
部主事歷郎中出爲廣東副使改廣西歷四川參政  
湖廣按察使浙江布政使以右僉都御史巡撫應天  
乞歸起南大理卿工部侍郎俱不赴拜兵部侍郎命  
下先卒

秋日同友人泛東湖

剩有南樓興還登湖上舟晚涼初吹蛤柔艣不驚鷗老去稀

同輩觴行緩百憂自憐遲暮日猶逐少年遊

鍾庚陽 一首

庚陽字長則秀水人隆慶戊辰進士除太平推官入  
爲大理評事遷工部主事歷員外郎中出知鎮江府  
謫廣德知州終刑部員外郎有焚餘集

真州守風岳水部石帆移酌舟中

同是飄零客江濱載酒過潮生秋氣早樹帶夕陽多鳩拙方  
棲棘鴻冥豈受羅相看此風色不飲夜如何

沈懋孝 一首

懋孝字幼真平湖人隆慶戊辰進士選庶吉士授編  
修進修撰遷南司業謫兩淮鹽運司判官有琪林雅



詠

靜志居詩話晴峯樂府句摹蕭倣不脫懸下稟曰餘體斐然能於同中見異田按幼真論詩云友朋離合登臨流覽吾取法李于鱗又云舉世昧昧此境將燕于鱗之目不瞑可謂篤信其自運殊乏警特

古意

落花天氣春餘幾垂柳青青日又曛  
深立繡簾人不見輕風吹動縵金裙

賈三近二首

三近字德修嶧人隆慶戊辰進士選庶吉士遷吏科給事中改戶科進太常少卿改督四夷館歷大理少卿南光祿卿改北以右僉都御史巡撫保定召拜大

理卿進兵部侍郎有東掖漫稿

穀成山館集石葵歌詩清爽疏宕咳唾立成

明如村

荆門草色幾經春十里江花倚錦茵試問蛾眉山上月當年  
曾見漢宮人

重遊青檀寺

水落前溪碧樹秋西巖蘭若幾經遊危巢野鶴何年去舊識  
山僧今白頭

顧大典一首

大典字道行吳江人隆慶戊辰進士授山陰教諭歷  
處州推官遷南吏部郎中出爲山東僉事遷福建副

使謫禹州知州改開州有清音閣集十卷

閨思

朝日斜照戶垂楊低拂床新篁未解簾幽蘭已謝芳玉筋流  
殘粉金爐冷夕香羅衾空有夢無信往遼陽

陳巖之一首

巖之字泰仲閩人隆慶戊辰進士累官雲南副使

送僚友謝病還蜀

北闕辭供奉西風獨遠行輕裝歸故國祖帳愴離情月落銅  
梁樹雲隨劍閣旌馬卿多病渴何日賜金莖

沈思孝一首

思孝字純父嘉興人隆慶戊辰進士授番禹知縣入

爲刑部主事以疏論張居正奪情廷杖戍神電衛居  
正死召復官進光祿少卿改太常少卿遷順天府尹  
改南太僕卿病歸起南光祿卿進右僉都御史巡撫  
陝西改撫河南不赴召爲大理卿進工部侍郎遷右  
都御史協理戎政天啟中贈太子少保有行戍郊居  
西征陸沈諸稿溪山堂吾美堂等集

四庫總目思孝有韻之文流麗清脫

摘李詩繁純父格調幽疏聲文華潔長於近體

田按江陵在位安內穰外功自不可沒而暴戾恣睢

挫辱正人純父與艾和父合疏論其奪情廷杖八十

逮繫之辰蔡伯華入視純父雪涕言曰消息危甚吾

必棄官扶而櫬還偵者瞪目視之伯華神色自若純

父被杖後血肉淋漓下獄三日始僉解戍神電衛巡

撫劉堯誨者江陵黨也以尺符召之且牒尾手署曰

過期一日并逮卒杖之死純父行至恩平病不能前

縣令促之純父補一匕首示令曰中丞必欲殺我我

與之俱發耳不然卽伏尸軍府中今天下士大夫皆  
知中丞殺我也堯誨間之氣阻得不死伯華作壯哉  
行以紀其事純父之行也王弼州胡元瑞袁景從有  
詩送之其辰戌所也講經授徒蔡郡丞慙昭還也介州  
山亭海剛峯有文朱宗良有詩紀之其召還也介州  
輩復爲歌詩以張之弇州詩云萬死投荒不自嗟片  
鴻鵠我白鷗沙神交豈必從傾蓋身在何須復論家  
過嶺清霜披瘴色懷人古戍有梅花江山處處堪文  
苑莫道窮愁負歲華元瑞詩云一夜飛章動紫宸衣  
冠回首避龍鱗千秋愁減孤臣血萬死猶存逐客身  
燕嶠雪霜懸疏草日南花鳥候旌遙知到日羅浮  
夜獨倚吳鉤望北辰景從詩云謫去君何意臨行  
佩刀憂危甘鼎鑊忠信涉波濤嶺海風煙直江雲瘴  
癘高天王自明聖行矣莫辭勞宗良詩云百粵羣山  
盡鬱盤草亭孤倚白雲寒高情不爲投荒憾絕檄翻  
同勝境看瘴海煙霞脚擁膝蓮廬天地一憑闌傳聞  
已下巖廊召回首銅魚路渺漫弇州歌送純父北上  
兼訊艾光祿趙宮贊云純父自奉金雞赦歸奉嚴親  
五湖社閉戶初憐此身得傍人再訝除書下母論當  
路急需賢我自鑿坏猶勸駕繁霜臘作吳門冰勁節  
與之剛峻峭時當鼓棹如漁父誰不呼舟並李膺此  
時絳灌須辟易此際屈賈仍馮陵承明聖耶初保直

萬里天顏今咫尺臣直轉彰人主仁君肥卻慮吾民  
瘠光祿艾卿趙宮贊握手生還玉門色趙子夙昔同  
襟期艾卿亦忝文字知但令朝著有三益容我衡門  
歌四雖君不見發弩健兒縱騰鼠又不見埋輪使者  
甯狐貍丈夫有才莫小用他日舜世肩皋夔元瑞聞  
純父內召作云南過銅柱絕風塵北望金門戀隱淪  
豈翫花前千里夢桃榔樹底十年人驂鸞盡閱名山  
色驅鰐長流大海春聞道天雞來旦暮可令宣室遲  
孤臣

### 秋日閒居

候火照西州專征白露秋蓬婆城不閉羅鬼戍還留轉餉盤  
江惡徵兵蜀道愁銅標誰更勒空憶武鄉侯

### 唐可封一首

可封字富順人隆慶戊辰進士官南戶部郎中

### 後湖同官讌集

玄洲開府勝覽集仙才倚櫂迴春句尋芳過古臺煙花湖  
上麗鵲鏡中來夕照重回首漁歌正溯洄

陳堂 一首

掌字明佐南海人隆慶戊辰進士累官光祿少卿有  
朱明洞集

二月久雨簡鄰父

浹月多陰雨花愁不似春久無新燕至似厭主人貧車馬嗟  
歧路江山羨隱淪相期聊一醉長作潯西鄰

張一桂 一首

一桂字玉陽祥符人隆慶戊辰進士選庶吉士累官

吏部侍郎

慶成宴

千官拜舞載養觴泰時同鑾樂未央瑞日乍臨仙闕曙祥風  
輕拂御爐香酒分醺醉傳鸚鵡樂奏簫韶下鳳凰共沐恩波  
何以報願歌天寶祝吾皇

華叔陽二首

叔陽字起龍無錫人學士察子隆慶戊辰進士除禮

部主事有禮部集八卷

四庫總目叔陽爲華察之子王世貞之壻所作五言頗有父風

春晚同韓存良諸君郊外燕集

投身嬰塵役坐惜春暉馳忽枉嘉侶招暫愜林中期晴靄  
芳甸柔風披綠蕤遂浹班荆好因懷修禊時垂楊陰長坂落



英汎清漪立言超俗趣戀賞杯行遲覽勝豈必遐所貴獲衷  
私故山多白雲緬焉勞我思

早秋夜坐

炎歊欣夕歛秋意滿幽堂帙散閒堪把琴清靜自張疏星帶  
高樹微月明虛床何處遙鐘起塵心坐欲忘

唐邦佐

二首

邦佐字惟良蘭谿人隆慶戊辰進士授泰和知縣改  
如皋儀真入爲刑部主事謫兩淮運司判官改贛州  
府通判遷光州知州有比部集

病後齒落垂盡感歎

垂老心猶童覽鏡朝未置摘白整吾冠謂老或可諱豈知齒

牙脫衰態難自蔽因憶爾初生玉白銛鋒利相從能幾何竟  
作鉛刀廢母乃肥甘傷得非言語累始脫殊自驚向人重含  
媿次第日以多安危不復計亦知本根撥枝葉終應墜非  
束窗梭去作下阪驥從茲三緘口至理有深契

贈吳孺子

吾憐吳孺子瀟灑出人羣真隱非幽壑孤蹤似野雲三江春  
欲徧五岳杖平分訪古山陰道先尋禹廟文

帥機二首

機字惟審臨川人隆慶戊辰進士授汝甯教授改國  
子學正遷兵部主事乞南改禮部歷郎中謫兩浙鹽  
運司運副歷彰德同知遷南刑部郎中出爲思南知

府有陽秋館集四十卷

湯顯祖玉茗堂集思南君詩深穠澹簡率境而成  
列朝詩集萬歷甲午西夏平惟審進頌詔付史館與  
湯義仍爲友惟審爲南膳部郎義仍入南成均晨夕  
過從故有著冠須訪戴脫冠須訪帥之詩惟審多謔  
古文奇字好制賦擬古二京及諸篇什僅存營魄要  
爲淹雅名士  
田按惟審守思南獎拔士類多所成就五言研練不  
爲義仍之溫體惜不得其全集錄之

由從姑山登麻姑山

從姑邇郭門峯高徑亦窄巖下列僧房亂泉時瀝滴東竇徑  
穿雲陰洞容枕席漸高境彌佳天橋霄漢迫遙望麻源山明  
發究登歷雨意始蒼茫晴暉生嵐色霏煙結冥濛丹井函純  
白三復謝公詩慷慨顏君石想見玉女蹤嗚佩安可覲洞天  
舊占名仙都果繫籍平生慕江海此日探靈跡誓委九年心

欲搏萬里翼，細懷周續之。竄景駐衰厯。

送客寓清涼寺

水殿清幽歌館餘，今朝化作梵王居。後庭花謝胭脂冷，猶自涼風薄綺疏。

方沆二首

沆字子及，莆田人。隆慶戊辰進士，授全州知州，遷南戶部郎中，改刑部，出爲雲南僉事，謫甯州知州。有猗蘭堂集。

玉筍詩談子及詩非貞元大厯以上語，不道余出守渝州後子及乃入青溪社，同社中七君子納涼詩高閣憑臨野望寬，翻賦賦客共登壇，百年逸氣還河朔，七子才名自建安，牛渚風生檣影動，龍山翠落酒杯寒，悠然鐘磬江城暮，不盡狂歌更倚闌。閩書喻邦相云子及詩如秋山吐色靜，女揚蛾五言。

尤勝

蘭陵詩話子及少時避地邵武學詩於吳明卿在南  
曹日與陳子野張結青溪社詩律益進五言如山合  
松楸晚沙寒橘柚秋療深青草候地控白狼西七言  
如華表月明疑鶴下孤臺風起有龍吟江魚愁阻經  
年字櫓燕低窺隔水簾山水暗通花下艇羣峯晴擁  
竹西樓微歌子夜供清賞結客丁年佐勝遊固是中  
唐人語  
田按子及詩音節高朗

詠古

叔夜稱龍性貽書絕良朋當其鼓鍛時意氣良自矜養生慕  
松喬絕響託廣陵嗟彼冥鴻翮竟懼燉與矰援琴赴東市咄  
咄愧孫登

送羅惟敏比部暫告還吳門

一疏辭丹陛雙旌出舊都倦遊成傲吏高論著潛夫秋水三

江釣春雲五嶽圖

知金虎署造夜法星孤

喻均 二首

均字邦相新建人隆慶戊辰進士除工部主事以事  
謫官尋遷南溪知縣歷處州松江知府進天津兵備  
副使有蘭陰虎林仙都括蒼雲間前後山居等集

弇州山人續稱邦相詩文氣雄調古往往出人意表  
詩藪近日詞場自吳楚嶺南外江右獨爲彬蔚與余  
交最久者喻邦相胡孟弼朱可大喻如浙江觀潮雁  
宕天台等作胡如天津望海匡廬彭蠡諸篇朱如泰  
岱嵩高兩岳遊稿皆高華雄邁與嘉隆相表裏  
田按邦相入郢鄂四十子之列律句琅琅振玉

贈別沈純甫謫戍入粵純甫舊令粵有遺愛焉故次篇  
及之

誓死銅龍效朴忠餘生還識主恩隆向來共道詞華麗此去

兼傳諫草雄炎海月明乘障後羅浮秋色入杯中故人亦是  
清狂者轉向休文恨不窮

楚江風送逐臣舟那得平原十日留客夢暫隨萍梗合離心  
數傍瘴雲浮洲前芳草悲公子嶺外梅花識故侯最是番禺  
諸父老不禁清淚向君流

田一儁一首

一儁字德萬大田人隆慶戊辰進士選庶吉士授編  
修進侍講屢遷禮部侍郎贈禮部尚書有鍾臺遺稿

十二卷

無題

兩朝勲業列旗常運正台階十五霜功格皇天誰可比只應

前世有空桑

國史唯擬田一偶無題詩爲江陵奪情發也又春日偶感詩云兩夜東風作意吹桃紅李白冠當時多情卻恨春光少底事同林隔一枝似指張懋修嗣修兄弟若云曷少渠家一採花耳情見乎辭

胡來貢

一首

來貢字順菴掖人隆慶戊辰進士累官大同巡撫

寄人

雪中寥落故人稀卻憶平原識布衣惆悵不堪聞戍角梅花一夜落金微

程拱辰

一首

拱辰字仲星莆田人隆慶戊辰進士歷官應天府尹

就遷南通政使



鈎臺

煙水環山碧不見垂綸客空餘此高臺惆悵千年迹

葉九金 一首

九金字廷相莆田人隆慶戊辰進士歷官江西僉事  
送沈二丈下第南歸

握手臨流共醉歌相看意氣竟如何河橋柳色愁中盡禁苑  
鐘聲夢裏多此日琴堂清夜短幾時湖海客星過古來白璧  
終須售莫向荆山泣卡何

徐大任 一首

大任字重夫 號人隆慶戊辰進士除工部主事歷  
官工部侍郎

飲袁家園

白雲<sup>山</sup>雲樹好況復此亭林牆不礙山色池能清客心蓬蒿  
蹊未沒濠濮想偏深幸有羊求在名園豈陸沈

胡汝煥

一首

汝煥字文甫南昌人隆慶庚午舉人

六郡良家子

六郡良家子翩翩意氣雄結營當太白吹劍拂長虹心折胡  
塵外名高漢殿中請纓君等事長揖莫論功

梁岳

一首

岳字

廣州順德人隆慶庚午舉人官瑞州推官

浪遊淹歲月倏爾鬢毛斑舟楫飄零苦關河去住艱停雲思

故國貫酒破愁顏芳草江南綠王孫幾日還

明詩紀事

貫陽陳 田輯

庚籤

張元忭

一首

元忭字子盡紹興山陰人隆慶辛未第一人及第授  
修撰進左諭德兼侍讀有不一齋文選七卷

登第後寄親友

昔余秉微尙築室稽山幽嘉朋日萃止六籍事冥搜顧慙學  
術疏徒然抱先憂屬時際休明封非誤見收弱羽乘風雲眇  
質依嵩邱皇恩等蒼大捐糜難爲酬寤言循素履勉希前  
修晤彼鴻鵠舉詎爲稻粱謀

鄧以讚

一首

以讚字汝德新建人隆慶辛未第二人及第授編修  
移疾歸起中允不赴再起南祭酒就遷禮部侍郎改  
吏部再改北吏部贈禮部尙書諡文潔有定宇先生  
集四卷

田按文潔通籍後居西山三十年在官僅滿一考清  
介之風可以抑浮競與華亭陸文定後先媲美

答張洪陽道房見寄

聞雁秋懷起思尊歸夢頻暫陪仙署吏自是倦遊人有病過  
從少無家僮僕親壯心今幾許清賞在江濱

吳中行

二首

中行字子道武進人隆慶辛未進士選庶吉士授編

修以論張居正奪情廷杖爲民居正死起故官進右  
中允歷洗馬攝司業事進右諭德乞歸起南侍讀學  
士掌院事未任贈禮部侍郎有賜餘堂集十四卷

靜志居詩話江陵奪情事在萬曆五年七月迨十月  
之朔彗星見大內火於是既望三日吳公疏上次日  
趙檢討用賢疏上又次日艾員外穆忱主事思孝疏  
上江陵怒不可止而諸公均受杖矣方杖時鄒進士  
元標疏復上一時士氣持正若是許文穆以庶子充  
日講官爲吳趙二公餞鐫玉杯一銘曰班班者何下  
生淚英英者何蘭生氣追之琢之永成器以贈吳公  
犀杯一銘曰文羊一角其理沈黜不惜剖心甯辭碎  
首黃流在中爲君子壽以贈趙公玉杯今不見犀者  
爲吾鄉何少卿裝音所得余嘗飲此作歌  
田按子道集中植綱常疏爲江陵發也正朝廷疏爲  
吳門發也是時吳門爲言路所誅求去九卿多上疏  
留之者子道疏云借留賢之名而保輔臣此諂諛之  
極也甚可恥也上言大臣德政律有明條輔臣者股  
肱也或因事乞歸被言投劾宜去宜留聽之朝廷何  
邇年以來每遇輔臣辭位必羣然起而留之頌功贊

德累牘聯章此其心何心哉其言甚正子道與趙用  
賢論江陵奪情被杖江陵死後起官上頗嚮用史稱  
用賢性剛負氣傲物數嘗議大臣得失言官江東之  
李植輩爭鬻之大學士申時行誑國等忌焉會植東  
之攻時行國遂力誅植東之而陰斥用賢中行謂昔  
之專恣在權貴今乃在下僚昔顛倒是非在小人今  
乃在君子意氣感激偶成一二事遂自負不世之節  
號召浮薄喜事之人黨同伐異罔上行私其風不可  
長蓋國先與吳趙同官翰林刻玉杯犀杯贈之其詞  
激烈厥後國入政府附和吳門又吳趙爲上所嚮用  
心忌之遂肆口誅訾不遺餘力利害切膚與向所贈  
之詞先後刺謬君子於此觀人品焉

### 送王龍州座師使事還里

太行秋色不禁寒六傳西征擁繡鞍使節再將仍問俗除書  
兩考不遷官內廷供奉含香侍故國馳驅負弩看清世台垣  
多氣象上卿早晚入長安

### 過彭城簡莫憲使

幕府依然病客過只今無夢到鳴珂官情合自風波減聖德  
元從雨露多高枕尋常消白日片帆信宿下黃河夕陽賁得  
新豐酒何處逢君一醉歌

周嘉謨 一首

嘉謨字明卿漢川人隆慶辛未進士除戶部主事歷  
郎中出爲韶州知府歷四川副使按察使布政使以  
右副都御史巡撫雲南進督兩廣軍務兼巡撫廣東  
加右都御史遷南戶部尚書召拜工部尚書改吏部  
以忤魏忠賢引歸削籍崇禎初起南吏部尚書加太  
子太保贈少保

田按少保正色立朝當魏忠賢得志之初持正不阿  
屢疏求退忠賢矯旨許之其陛辭出朝詩云連章得



請賦來歸丹陛陳情淚涇衣自信心長綠髮短敢云  
昨是覺今非兼驅猛獸無長策閑伴浮鷗有息機獨  
使至尊勞旰食難將寸草答春暉夫惟大雅既明且  
哲少保足當之矣

### 答胡公占

幽興從來愛薜蘿名園高峙帶江沱竹間有客攜琴人花裏  
容人載酒過百里星原因德聚一宵話勝讀書多只今春色  
郊原滿何日相期卧綠莎

### 王祖嫡三首

祖嫡字肩昌信陽州人隆慶辛未進士選庶吉士授  
檢討遷國子司業歷洗馬進侍讀有師竹集三十七

### 卷

田按時人有議王元美父子之禍爲元美激之者肩  
昌作誓辨之曰人言分宜父子甘心楊忠愍元美時

爲郎與二三君子哭之痛相嗣聞而惡之謂所親曰  
胡不移此哭乃公由此司馬公不免嗚呼司馬公之  
冤不繫元美哭與不哭也昔漢暴彭越屍有哭者夷  
三族而縲布哭之後世且多其義茲思愍非越比又  
無禁令乃於不可知之事不可測之禍傳仁人孝子  
耶至於沈湎縱飲必分宜當國時元美畏禍故以此  
自污不則洩憤宜鬱昔人所謂長歌之痛者耳元美  
引之四十子之列且贈詩曰傾蓋豈必深慨焉成辨  
謗卽此謂也脩昌詩長於詠古

### 溫泉

幽薊煙塵激九重貴如湯殿罷歌鐘中宵扈從無全仗大駕  
蒼皇起六龍枚叵留金翡翠暖池猶浸玉芙蓉荆榛一閉  
朝元路唯有悲風吹晚松

### 乾陵

乾陵雙闕峙高岡象馬夷酋儼列行一代大倫爭子姪三朝

宏業忽周唐南山枉贊秦皇錮西盜終窺呂雉藏無字穹碑  
誰記述九原重起駱賓王

岳墳

殘雪方舟渡六橋棲霞祠宇薦山椒金牌鐵馬無勞問白馬  
朱旗尙可招北宋陸沈三字獄西湖水接伍胥潮祁連鬱鬱  
環孤塚麥飯諸陵久寂寥

馮時可二首

時可字敏卿松江華亭人隆慶辛未進士除刑部主  
事改兵部歷員外郎中出爲貴州副使改四川歷廣  
西湖廣參政有西征超然樓天池石湖皆可繡霞北  
征後北征燕喜滇南武陵等集

遊飛雲巖

明詩選陳卧子曰吾鄉元成可方吳門劉子威  
靜志居詩話元成詩極爲牧齋錢氏所詆就全集而  
觀甫田彌望稂莠汗萊獨五古一體尙有遺秉帶穗  
可供拊拾以比劉子威翻覺勝之  
田按元成博綜下筆千言娓娓不能自休談史談藝  
當時異聞軼事往往散見集中惟詩不能成家

自余探幽賞會心惟此山  
突兀聳芙蓉支嶺若連環攢丹冠  
斜日浮翠亂秋煙溜溜滴寶乳泠泠響溪泉苔壁圖綵繡松  
濤韻清絃侵戶澗芳馥射衣雲影鮮去美非一適來奇變萬  
端徇華豈達生獨往復何言

馮時可西征紀宿月潭書院時已夜半泉流有聲疑  
爲風雨疏軒視之星河森煜由樓後礪石磴折而上  
謂飛雲巖去地百餘尺上突下嵌巖下可坐數百人  
石如虬奮如鵬矯如霞攢勢飛動左有深洞巖前三  
石峯如三指志稱錦嵒珠壑非虛也  
田按飛雲巖在黃平州城東二十里爲吾黔最奇之

月蝨名一  
境王陽明有記

同申少師飲凡夫齋中

緬懷新築勝丹閣俯嶙峋閒擊山中相幽尋世外人瀑飛剡  
溪雪花發武陵春便欲移家住於斯並采真

郭子章一首

子章字相奎秦和人隆慶辛未進士除建甯推官遷  
工部主事歷郎中出爲潮州知府遷四川僉事歷浙  
江參政山西按察使湖廣福建布政使以右僉都御  
史巡撫貴州進兵部侍郎右都御史兵部尚書加太  
子少保有輿草十卷蜀草七卷浙草十六卷晉草九  
卷楚草十二卷閩藩草九卷家草七卷黔草二十一

卷養草一卷苦草六卷傳草二十四卷

過餘慶司

餘慶山行踏磴危幸逢春仲日遲遲荒村祭賽仍茅屋新戶  
編門半竹籬夾道櫻桃開白蕊隔江楊柳換新枝猶聞豺虎  
當吾路去去埋輪一問之

黃洪憲

一首

洪憲字懋忠嘉興人隆慶辛未進士選庶吉士授編  
修奉使朝鮮還進侍讀厯右庶子遷少詹事掌翰林  
院事有碧山學士集二十一卷別集四卷

田按碧山學士萬厯戊子主順天試取王文肅子衡  
爲榜首李鴻又申文定壻也爲言者攻訐朝命覆試  
文皆如格學士疏十上乃得歸後言者猶以爲口實  
在籍聽勘學士工於制舉文詩非所長

上疏後長安友人相訊賦謝

閭闔天高五鳳樓，覆盆何幸徹宸旒。  
故人霄漢誰青眼，老我江湖已白頭。  
涉世總知名是累，論交惟有淡相投。  
山翁到處堪瓢笠，一笑從人呼馬牛。

郭子直

一首

子直字舜舉，崇德人。隆慶辛未進士，除行人，歷官福建按察使，有三遊草。

小園

扶疏草樹繞空亭，隱几山光雨後青。  
吏散鴉啼明月上一簾，花影讀黃庭。

劉珠

一首

珠字福井公安人隆慶辛未進士除戶部主事有疑

### 菴集

國史唯疑劉珠舉丁酉鄉試越三十五年辛未始成進士江陵少以父執事珠每計偕攜一烘魚爲饋諸僕役熟識之曰公安孝廉又來矣卒爲江陵所取士壽日獻詩要知座主山爲壽但看門生雪滿頭江陵笑曰此老故態也然珠無所附麗又十年終計部郎想世態已所熟聞

### 過襄陽

高城百尺倚雲霞夾道垂楊盡宿鴉  
春雨綠添習池水晚風紅落大隄花  
橋橫畫舫明江岸人唱銅鞮過酒家  
景物不殊鄉土近高堂猶自憶京華

### 熊敦朴一首

敦朴字茂初富順人隆慶辛未進士改庶吉士累官



貴州參議有玉堂漫稿謫居稿

送沈比部謫高州

當代論才子人推沈隱侯  
一身重彝鼎萬事等浮漚  
已分沈湘去難期眾楚咻  
遷人終汨沒天意欲沈浮  
聞道高涼郡深同卑溼陬  
炎山長似夏漲海不知秋  
往往鄰鮫室時時傍蜃樓  
賜環如有待去矣莫夷猶

吳中立一首

中立字公度浦城人隆慶辛未進士以終養歸起禮部主事未赴遷尙寶司丞

梁章鉅南浦詩話公度登隆慶辛未進士疏請歸養父沒服闋應就選喟然曰古人爲祿養今祿不逮親矣遂絕意仕進入武夷杜韞巖構登恬菴而隱焉張侍讀元忭以詩訪之云杜韞巖中人曲江舊同席未

遊武夷

折彭澤腰早著東山屐樓心老氏書結廬武夷側清  
峯萬點青雲溪幾條曲立閣夾長松丹房架危壁巖  
頭露可餐巖下芝可摘猿鶴時爲羣車馬杳難卽我  
本邱壑人聊佐金門客煙霞夙同好出處偶殊途  
觀聲利場何似神仙宅四十已無聞百年亦瞬息  
然赤松子巢居鍊形魄明發出閩嶺題詩訂泉石

溪流寒玉山圍翠飯熟青精石乳茶怪得曾孫貪住世不離  
煙火是仙家

秦耀一首

耀字道明無錫人隆慶辛未進士選庶吉士改兵科  
給事中厯刑科吏科遷太常少卿改光祿擢僉都御  
史巡撫南贛改湖廣有寄暢園詩集

清鑣

寄暢園二十景之一

竹光冷到地慢卷湘雲綠隔塢清風來聲聲夏寒玉

方揚一首

揚字思善歙人隆慶辛未進士除陝州知州遷南戶  
部主事改隨州知州歷嘉興同知進杭州知府有初  
菴集十六卷

冬日同方子及齊王孫吳山人遊牛首

選勝出塵埃叢林一徑開雲陰懸石磴木末起層臺山帶寒  
煙暝江涵夕照來憑虛望不極磊砢思難裁

周光鎬一首

光鎬字國雍一字耿西湖陽人隆慶辛未進士除甯  
波推官遷南戶部主事改吏部歷郎中出爲順慶知

府遷四川副使進參政歷陝西按察使以右僉都御史巡撫甯夏入爲大理寺卿有明農山堂策草

謁武侯祠

錦江十里錦城東丞相立堂翠靄中魚水君臣興蜀漢龍蛇風雨走祠宮參天老柏巢雙鶴落日長橋飲斷虹一自杜陵題詠後直令千載泣英雄

王教一首

教字子修蒲川人隆慶辛未進士官吏部郎中有銓部集

清風亭對月

永夜不成寐猶憐旅興生何來江上月解作故鄉明別院繁

砧響寒雲墮雁聲寥寥杯酒後悽斷若爲情

詹沂一首

沂字浴之宣城人隆慶辛未進士授新建知縣擢南  
吏科給事中以忤張居正出爲山東僉事旋削職歸  
起奉化知縣遷禮部主事歷員外遷光祿丞歷南尚  
寶太常太僕卿進左副都御史有潔身堂集

宣城事面萬曆丙午除夕上謂左右曰此時廷臣受  
外覲官書怕開宴打鬧惟侍郎楊時喬李廷機副都  
詹沂三人清寂可念其爲上知如此

施肖華謁徐選部不遇詩以慰之

挾策遊燕市蕭然鬢已疏不逢楊得意誰薦馬相如此日空  
彈鋏何門可曳裾窮途莫漫哭好返薛蘿居

謝師啟 一首

師啟字叔蒙蒲圻人隆慶辛未進士官參政

五嶽觀

千山回合繞清溪落盡桃花路不迷  
笙鶴不知何處去春風只聽子規啼

宋儒 一首

儒字大中麻哈州人隆慶辛未進士選庶吉士改禮部主事

慶成宴

金輿玉輦漢郊還紫殿瓊樓捧御筵  
簪珥千官分廣座笙鏞九奏合鈞天  
霞漿共醉蓬萊上雲祲新開日月邊  
天保欣逢

魚藻慶齊將華祝頌堯年

林章 七首

章初名春元字初文福清人萬厯癸酉舉人有林孝

廉集

小草齋詩話林春元才士也桀驁不羈常作蛾眉篇  
自述其意才情楚楚信自可人  
石倉文集初文才士不欲以庸孝廉是處好為人排  
難解紛乃以無心獲罪謝司寇出之縲紳之中適遼  
海有警累上書進奇策願身列戎行練甲兵備緩急  
爲嫉者所繩解憲而死詩如客情如春草無處不堪  
生無家逢寺好多病見僧親曉煙常帶雨夜月忽嘯  
禽千山風雨裏一任子規啼春風與柳樹年年是故  
人春好年年晚月寒夜夜秋皆絕酸楚  
露書林初文嘗在揚子江中青山口覆舟坐皮箱上  
見有持紅燈二從前過隨木商救之又嘗夢人贈之  
以扇上題茂陵風雨四字自意不佳後以上書得禍  
因作蛾眉篇云茂陵風雨千秋夢揚子波濤一夜悲  
列朝詩集閩中詩派宗子羽而福繼之以撫做蹈襲

爲能事初文才情跌宕於唐人格律時欲跳而去之  
要能不爲閩派所羈縻可謂傑出者也世宗末倭寇  
犯閩初文年十三上書督府求白試行間既舉於鄉  
累上不第走塞上從成大將軍游座上作灤陽宴別  
序酒未三巡詩序並就將軍持千金爲壽緣手散去  
挈家寓金陵憤南曹曲法斷獄奮臂直之坐繫獄三  
年始去關白之亂兩上書請用奇兵出海土勤賊報  
聞而繼又抗疏請止殲殺兼陳立兵行鹽之策帝感  
動下內閣票擬舉行四明相承中人指閩其事密揭  
請逮治望闕長歎憤懣撫膺卽日下獄暴病而死天  
下惜之  
閩小紀福唐林春元七歲能詩師召試之適有牧羊  
者指爲題卽應聲曰三百羣中步獨先有時高叫白  
白雲天會從北海風霜裏伴過蘇卿十九年後舉於  
鄉更名章有集行世才情淒婉  
漁洋詩話初文有送人詩云不待春風不待潮渡江  
十里九停撓不知今夜秦淮水送到揚州第幾橋以  
示梅禹金禹金激賞之宣城有老儒邱華林嘗以詩  
質禹金但爲分句讀而已見而大恚曰林詩二十八  
字正得二十八圈吾詩字數不啻倍之乃不得一圈  
耶聞者笑之  
田按初文詩才情俊爽聲調淒涼有賈生年少之風



受正平傷生之累可惜也

### 金陵懷古

長江一洗六朝兵  
江北江南無限情  
剩水殘山吳故壘  
閒花野草晉空城  
石頭古樹逢秋落  
浦口寒潮入暮生  
最是天涯留滯客  
不堪商女蹋歌聲

### 潞河驛

冷風殘雪潞河灣  
十載家鄉一日還  
不作揚雄投漢閣  
甯爲樂毅出燕關  
漠南廬帳連三輔  
海上樓船動百蠻  
無路報恩空有劍  
春明回首淚潸潸

### 居庸關見阻示同行

怪得關前逐客頻  
匈奴早晚欲和親  
無襦應不空還漢  
有舌

何須定說秦雨氣千峯營幕曉梨花三月塞門春憑君斗酒  
城頭話猶勝新豐店裏人

酒舍

爐頭竹葉千杯有扇底桃花四月無且放歌聲滿天地莫開  
醒眼向江湖南人不復憐鸚鵡北客何須悵鷓鴣芳草斜陽  
看不盡春明門外獨躊躇

別妓

畫漿夷猶錦纜迴美人東上鳳凰臺朝朝疏洗臨秋水一路  
芙蓉不敢開

崔季鶯

怕教雪落歌應懶愁作雲飛舞不輕偷向東風嚙柳畔一行

花雨一聲鶯

楊柳枝

楊柳青青河水濱  
春來日日送行人  
東風不與長爲主  
送盡行人卻送春

麥應中一首

應中初名來牟字孺時東莞人萬曆癸酉舉人

山行

王孫歸路草萋萋  
落日青山失舊蹊  
直道未應行不得  
鴈鵝何事向人啼

明詩紀事

貴陽陳 田輯

庚籤

孫繼皋

十二首

繼皋字以德無錫人萬厯甲戌第一人及第授修撰  
歷諭德庶子少詹事兼侍讀學士遷禮部侍郎改吏  
部贈禮部尚書有宗伯集十卷

四庫總目繼皋詩文雍容恬雅有承平臺閣之遺風  
葉向高蒼霞草孫公論撰溫夷冲粹  
田按宗伯五言冲淡有其鄉華子潛風調

送李山人

故人驄馬客春盡一書來分茗供幽事論詩得異才林塘堪

下榻風雨且深杯茗水逢新漲孤帆何處開

雨霽有懷錢徵君

二首

去住各何意交情中路分長安一夜雨漂泊倍思君樹鬢淡  
初日城陰低暮雲雁鴻那可問空自惜離羣

戶外雨不歇憶君初到時青山一以隔華髮總堪悲世事酒  
杯過閒情鷗鳥知離居未可道含意爲裁詩

夏日臥病

四首

客久堪誰過官閒穩自慵琴書供病色花竹散塵容晝杳滄  
洲夢時尋白鷁蹤東方有高隱吾意倘相從  
會心那在遠小築見幽情過雨宜花事當風忽鳥鳴青山供  
臥起白日廢逢迎懶病依然慣非高吏隱名

不淺煙蘿興塵中自掩關詩情消白日病骨傲青山野鶴焚  
香下閒雲散帙還浮名將薄宦吾意有無間  
乞假辭朝謁耽幽學隱淪病翻思客至閒不厭官貧高樹團  
晴靄穠花戀晚春物華偏在眼肯惜酒杯頻

送華三還南

彈鋏竟何意挂帆秋滿船艱難爲客倦慘淡逐人憐世路浮  
雲外鄉心落日前西風吹易水因爾一潸然

儀封道中

草草出門去那知成遠遊風塵難自料徒御總含愁有夢依  
鄉樹無書報野鷗歸心指河水日夜向東流

舟中漫興

彩鷁去仍還青林許共攀愁翻因止酒病不礙登山古寺蒼  
藤路飛泉白石灣何妨住十日與爾聽潺湲

秋仲龔方伯曠適園社集

水檻秋逾淨晴郊暑未消露荷仍的的風葉自蕭蕭對酒宜  
疏豁參玄契沈寥城頭暮吹笛疑有列仙招

寄酬李宛平內鄉

京兆田郎題柱客相逢我未厭承明幾陪韋杜春同醉一別  
荆吳歲屢更丹地不繁歸客夢滄江難忘故人情尺書傳字  
來何處愁聽流鶯樹裏聲

余孟麟一首

孟麟字伯祥江南人萬厯甲戌第二人及第授編修

歷南司業洗馬侍讀學士掌院事有學士集三十卷

答張山人

茅檐帶清溪疏松倚盤石  
裊裊挂飛蘿影入溪水碧  
抱獨諒在茲撫物欣有適  
鉤簾聽流鶯攜琴候逋客  
不見白雲歸惆悵日將夕

趙南星

七首

南星字夢白高邑人萬曆甲戌進士除汝甯推官入  
爲戶部主事改吏部歷員外郎中謫平定州判尋斥  
爲民起太常少卿改右通政進太常卿擢工部侍郎  
拜左都御史進吏部尙書以忤魏忠賢謫戍代州崇  
禎初贈太子太保諡忠毅有忠毅集二十四卷



高舉龍高子遺書齊鶴先生爲小詞多寓憂世之懷  
酒酣令人歌而和之慷慨徘徊不能自已  
姚希孟棘門集江陵相病朝士徧走羣望忠毅趙公  
與顧公憲成姜公士昌戒勿往仍爲紀事詩曰二豎  
能憂國千官爲祝年傳播人口趙公詩步武少陵淋  
漓沈痛語使人欲泣欲嘯欲縮地而談欲排閭而愬  
易水擊筑之音於今載見  
列朝詩集夢白公忠強直負意氣重然諾有熱趙節  
俠悲歌慷慨之風鄉里後進依附門下已而奔趨權  
利相背負酒後耳熱戟手唾罵更爲長歌小詞度語  
吳歌打槌竿之類以戲侮之其人銜之次骨夢白不  
知也在戎所賦詩飲酒唾罵笑傲一如平時不以謫  
居畏禍少有貶損人謂冠萊公蘇子瞻無以過也  
王士禎蠶尾續文高邑趙忠毅公北方偉人天下望  
之如泰山北斗詩長於古選頗有法度而又能自見  
其才思  
田按忠毅三歷銓曹一爲太宰激濁揚清凜不可犯  
可謂薑桂之性老而愈辣詩亦風骨鏗峻

### 短歌行

天迴地周時不我甯少壯易老胡爲多憂有客盈堂有酒盈

觴鐃鐘考鼓聊爲滛荒中區迫陰令我心惻白雲在天安得  
羽翼功名有數樂當及時齒髮一暮雖悔莫追愁令霜隕怒  
感山傾不如飲酒可以樂生維山有阿維河有潯嗟今之人  
誰知我心

長蛇歌飲鄒南皋作

洞庭長蛇一夜枯千人萬鬼驚歡呼嶺表流人歸滿塗今君  
奉詔來上都憶昔投荒向萬里聞君母老復無子君不識我  
我愛君常恐一旦含冤死天摧地折白日墮命寄羣虎欲誰  
恃魚龍送君置我前落日開筵面秋水平生結交盡賢豪昨  
見吳趙今見爾君亦先曾知我名獄中得自艾先生公等袞  
袞皆大用海內何愁更不平長跪進君黃金杯悲風颯颯從

天來欲飲不飲何爲哉不見爾鄉劉侍御白骨今爲螻蟻齧  
送李修吾謫東昌府推

古人無復望已愧李司農斷羽猶爲鳳批鱗欲觸龍太平方  
欲見狂直合優容海上憂時者君門更幾重

寄魏山人

千里憐同調春風招隱情白衣隨野鶴青眼待狂生遠水荒  
煙斷平林落日橫何時遊太室雲外聽吹笙

寄魏懋權時乃兄以言得罪

浮雲滿天地吾道竟何其仕路生俱拙交情死不疑鵲鴿君  
有淚烏鵲我無枝昔憶同樽酒茫茫未可期

柏鄉送歸德沈龍江相公

一首

別深相見一舒顏末進那堪鬢亦斑束帛祇妨高臥穩安車  
仍與太平還虛無莫道夔龍業恍忽初離虎豹關筋力喜看  
猶自健羽儀今日在山間

飛書作者何男子善類紛紛畏禍殃詣闕省郎朝上疏呼天  
愛女夜焚香生還暇恤時艱陋傳食猶沾帝寵光留宿柏人  
無所慮相望一水卽家鄉

田按妖書事起首輔沈一貫喉御史康丕揚等引已  
罷侍郎郭正域因以及次輔沈鯉賴左都御史溫純  
力持之東廠太監陳矩亦不聽一貫指乃以儼生光  
具獄正域鯉獲免此詩飛書作者何男子善類紛紛  
畏禍殃卽指此事也

李三才 二首

三才字道甫臨潼人

題名碑武功右衛軍籍陝西萬  
臨潼人明史作順天通州人萬

歷甲戌進士授戶部主事歷郎中謫東昌推官遷南  
禮部主事歷郎中出爲山東僉事歷河南參議山東  
山西副使遷南通政參議召爲大理少卿以右僉都  
御史總督漕運加戶部尚書以事落職爲民天啟中  
起南戶部尚書未上卒有雙鶴軒鵲軒二集

明詩選陳臥子曰修吾雄豪自喜領袖羣倫又能詩  
耶田按道甫縱橫之才揮霍自喜廷推閣臣遼陽失陷  
兩次擢用而議不決僅以淮撫老此邊才誦道甫金  
縉巖月翻挑虜宵肝朝廷已論兵之句爲之拔劍起  
舞

### 送張二遊天目魏大同賦

眞成南國隱無事北山文酌酒君將去  
市月帆卷富春雲莫復愁孤寂長空足

冬日同歐楨伯諸公飲李通侯清嘯軒

雨雪江天抱病時  
衝泥騎馬去何之  
西園公子頻迎客  
北海詞人共賦詩  
草色侵池春意動  
梅枝照眼驛書遲  
卻憐獨醒緣何事  
潦倒從人覆酒卮

李化龍

三首

化龍字子田長垣人萬厯甲戌進士除嵩縣知縣遷  
南工部主事厯郎中改吏部出爲河南僉事遷參議  
厯山東副使河南參政入爲太僕少卿遷右通政使  
以右僉都御史巡撫遼東進兵部侍郎乞歸起故官  
總督湖廣川貴軍務兼巡撫四川再乞歸起工部侍  
郎總理河道敘平播功晉兵部尙書加少保再加柱

國少傅兼太子太保諡襄毅贈少師加贈太師有襄

毅詩文集

明詩統于田諸作驪駒馳騁金玉陸離佳製也

明詩選陳臥子曰司馬功名之士詩亦清脫可誦

靜志居詩話于田詩雖沿王李餘波然頗爽豁牧齋

錢氏以其爲胡元瑞所稱議其醲厚肥腴而棄之不

錄未免矯枉也田按于田播州之功以一百四十餘日之期拓千餘

里之地改土設流建府二州縣十可謂偉矣海龍圖

銅標銘云皇帝二十有八年播人不軌天王赫怒爰

整六師以誅不供粵有四月盡俘厥醜遂緒其宮方

三千里始入皇封載勒銅標永鎮西南臣李化龍又

收軍前銅鑄鼎三等頒發土司永爲鑒戒其銘云

維星拱北惟水朝東天王御極八方會同惟西南夷

各世其封惟敬天念祖庶不墜厥宗順天者吉逆天

者凶以爲不信視楊應龍標今不存鼎土司中猶有

存者于田詩頗有豪氣

金臺篇贈李賓

我昔獻賦燕京道千載霸業迹如埽黃沙萬里接胡天白雲  
滿地生秋草李君家在金臺傍俠遊早擅少年場爭博不伏  
魯句踐擊劍全輕秦武陽金門十上策不收脫屣聊爲汗漫  
遊無魚不彈馮生缺失路還敝季子裘今來弔古石城下與  
君最是知心者醉後悲歌六代塵狂來睥睨長江瀉李君李  
君且莫論與君燕趙氣長存何處江湖無釣艇何處茅簷無  
酒樽與君明日扁舟去臂鷹獵兔老山村

吳明卿東遊泊舟江上同歐楨伯李惟寅方子及攜具  
訪之

西來一棹下滄波共識關門紫氣過七子才名吳質少六朝  
詞客秣陵多江雲入暮依尊酒浦樹含春起嘯歌剩有平原



十日興五湖煙月奈君何

送郎中兵備江西

爲郎十載羨休文  
憲府新開列戟分  
倚劍共瞻牛斗氣  
建牙親統鵝鵝軍  
潯陽九派平吞楚  
廬嶽千峯半入雲  
回首舊遊佳麗地  
過江魚雁好相聞

孫鑛四首

鑛字文融餘姚人萬厯甲戌進士除兵部主事改禮部吏部歷員外郎中遷太常少卿右通政以右副都御史巡撫山東拜刑部侍郎改兵部總督薊遼保定軍務進右都御史革職聽勘起南右都御史就遷兵部尙書參贊機務加太子少保有月峯先生集十二

卷

靜志居詩話月峯勤學過於士安慧業不如靈運觀其論詩有云韓退之於詩本無所解宋人目爲大家直是勢利他耳是何言與尸佼所云松柏之鼠不知堂密之有美樅者也

田按月峯與余君房論文書云王元美謂昌黎於詩無所解卽鄙見亦謂然昨偶看古詩一二篇弇州如何能到竹垞之譏月峯是未見月峰全集也月峯齋中偶成詩云吟詩遠遜歷城李作字猶慚鄆縣豐其自知審矣

遠覽樓

壯邑城雙峙奔流江九迴閑閤接地起舸艦逐潮來爽氣三秋勝雄觀百里開可憐枯旱後田野半蒿萊

陪省寮遊蓮花菴

野水通靈沼雲房傍帝家同官俱載酒乘興一看花圍熟供

嘗果冰寒可浸瓜山公正耽飲馬足莫愁餘

與客談邊事

腥羶款塞緣何策西北銷兵已六年馬市約期招虜入龍延  
講佛乞僧傳射聲校尉晨搖珮游擊將軍夜啟筵聞說雲中  
遭歲歉夷王猶給救荒錢

題畫

虛閣全當水面風曉來山色望朦朧白鷗江上幽人思都在  
輕煙細雨中

呂坤一首

呂字叔簡甯陵人萬曆甲戌進士除襄垣知縣改大  
同入爲吏部主事歷員外郎中出爲山東參政歷山

西按察使陝西布政使以右僉都御史巡撫山東拜  
刑部侍郎有去偽齋集十卷

列朝詩集侍郎敷歷中外所至有聲跡講求經濟實  
學皆可施行萬歷中鄭貴妃方擅寵撰女誡一書以  
明德馬后爲首侍郎序而刻之坐此爲朝論所譁不  
得大用君子惜之生平不求工聲律新樂府記載時  
事有古人諷諭之風

### 豫國士

身可漆炭可吞啞癩何足辭難酬國士恩君頭爲飲器安用  
我頭存橋下厠中誰在此義士甘心趙襄子君不見東鄰再  
嫁妻能爲後夫死

### 謝燕二首

燕字漢甫長樂人萬歷甲戌進士除行人歷兩京太

常少卿累遷順天府尹以右副都御史巡撫南贛進  
南刑部侍郎改北擢戶部尙書有天靈山人集二十

卷

送蔡侍御謫尉馬邑

馬邑神仙尉烏臺侍從臣片言思悟主三疏竟危身花暗邊  
城雨段迴黍谷春鳳雛雖鍛羽終不落風塵

宮人斜

埋玉空山土一坏落花飛盡水悠悠年年酒作啼鵲血遺恨  
春風十二樓

送游太初歸蜀

杜子堂西萬里橋使君歸去馬蹏驕詩成莫向啼鵲賦望帝

春魂恐未銷

李堯民 五首

堯民字耕堯濟甯州人萬厯甲戌進士除長洲知縣  
改永年遷御史厯大理丞進本寺少卿遷應天府尹  
有快獨集十八卷

大泌山房集耕堯近體朗秀

獨飲

牢落停雲徑淒其間字廬坐看秋已暮不醉欲何如菊在聊  
親酒玄成且罷書一聲天外唳孤雁又愁予

久雨忽晴晚坐

雲洗星初露煙霏雨乍收誰來共明月獨坐一丹邱遠杵寒

相答孤鴻迴自愁可知蕭瑟意不是爲悲秋

題刁稚渠園亭

背郭園成二百弓鶯花無數水雲封山銜堞影當軒霽雨挾  
松陰入徑濃坐領青霞供藻詠醉攜明月度芙蓉丹邱只在  
衡門裏汗漫何煩五嶽蹤

送于駕部文若之中州河憲

梁園春散吹臺空且急宣房瓠子宮只恐彩毫閒不得青霞  
片片落天風

侯中鵠趙庭言期臘夜文酒不果

月破霜空雪不分一尊親自領寒雲如何客有山陰興夜半  
無舟御李君

支大綸 一首

大綸字心易嘉善人萬厯戊進士除南昌教授遷

泉州推官謫江西布政司司官遷奉新知縣有華平

先生集五十二卷

田按心易仕宦不達集中述多恩怨之詞所著永昭二陵編年史沈景倩野編痛詆之觀其論大禮以永嘉爲是新都爲非所顛倒如此安能執筆而從南董之後乎

寄水部章循之

漉巾濁酒甕頭眠白眼逢人氣嶮然借問陽冰依幕客只今

誰似李青蓮

曾夢鼈 一首

夢鼈字君瞻莆田人萬厯甲戌進士官甯海知縣



金陵懷古

萬雉名都尙儼然銷沈王氣轉堪憐  
鹿遊故苑春苔滿鳳去空臺夜月懸  
六代廢陵迷宿草五侯第宅付荒煙  
鶯花不管興亡事點綴風光自歲年

林纘振一首

纘振字公悅漳浦人萬厯甲戌進士官工部主事有

梅雲館集

東南嶠外詩話公悅卒年僅二十七官軍來一詩佳甚

官軍來

官軍來官軍來昨日江頭賊已回  
將軍逐賊未百里將臺先向江頭開  
戟手罵賊奴恨不蹴爾成塵灰  
父老向前云將軍

幸勿嗔江頭賊過遺煙燼江邊剗戮餘千人殺者不可救骸  
骨空爲塵何不割取獻幕府軍校猶博首虜銀君不見往年  
之捷亦如此石壁城中二百家三百丁夫同日死總戎腰玉  
衣蟒衣擊鼓傳觴奏凱歸海外孤城未解圍

顧國輔一首

國輔

榜姓張

字惟德南京金吾後衛人萬厯甲戌進士

授刑部主事厯郎中出爲襄陽知府遷浙江副使謫  
寶慶知府

嘉善寺石壁

千林雨氣清新松藹如沐蒼厓修焉剖神秀勢超豁巨靈何  
年來揮斤剡山骨森然萬奇鬼竊爲互相逐崦岬書中開玲

瓏巖蒼玉地僻知者稀因之遠寄書將謝纓組歸來臥茲麓

林兆珂四首

兆珂字孟鳴莆田人萬厯甲戌進士除蒙城知縣遷刑部主事歷郎中出爲廉州知府改衡州安慶有挈

朋草

四庫總目兆珂七律頗得錢劉風調

蘭陔詩話孟鳴詩醞醖深厚吐納風流

田按孟鳴嘗刻黃白仲詩集頗博好事詩亦點化生新如但拚得失甯論馬豈爲公私故問蛙入夢蓮然誰辨蝶出遊樂矣我知魚幾忘其爲習見故事也

雜感

中夜不能寐起步庭南隅秋容何慘烈嚴雪沾我裾嗟哉芳

樹林銷落在須臾有生胡不適安有再來軀蜉蝣矜羽翼  
堯何其愚

病起漫成

習靜疏朝謁庭莎過雨新鶴形甯怯瘦龍性故難馴問道無  
河伯全生有谷神閒曹堪寄傲何必嘆前薪

閒居書事

會心豈在遠咫尺卽濠梁鳥下窺細帙花飛點石床無懷堪  
命氏何有欲名鄉漫道潘郎拙閒居趣自長

晚渡羅江卽事

雨散千峯日漸昏數家煙火澹孤村微波弄月潮初上遠浦  
歸雲樹半昏浣女踏歌喧古渡舟人指點話仙源宦情惟有

羅江識欲取鴟夷作酒尊

游朴 一首

朴字太初福甯州人萬厯甲戌進士除成都推官入  
爲大理評事累官湖廣布政使有藏山集

白石舟中簡沈比部

蒼茫寒日暮繫檣楚江門共惜諸賢去誰招九辨魂客途還  
自遣時事不堪論嶺表多醕酒愁時進一尊

朱期至 一首

期至字子得蘄水人萬厯甲戌進士除戶部主事厯  
員外郎中終懷慶知府有王屋山人集

送胡之驥歸里

雨雪千村暮江城一騎還故人疏白髮吾意卜青山游俠愁  
看劍風塵強破顏囊中詩句在那惜路閒關

伍讓一首

讓字子謙衡陽人萬厯甲戌進士除中書舍人遷刑  
部員外改禮部出爲雲南僉事改貴州厯河南參議  
江西副使

贈濟上人

深居不用買青山飛錫煙霞此閉關香閣旃檀諸品淨六時  
鐘磬老僧閒眼看分竹成龍種手自栽松待鶴還借問禪心  
何所似白雲無繫水潺湲

曹一夔一首

一襲字雙華武岡州人萬厯甲戌進士除行人遷御史出爲浙江僉事有虛白堂集

寶方山

洞門瑤草白雲深  
千樹萬樹綠森森  
石床丹竈空流水  
試問仙人何處尋

鄭須德一首

須德字存修莆田人萬厯丙子舉人官彭縣知縣有綠野堂集

采蓮曲

湖水綠於染  
小艇輕似葉  
十五採蓮女  
嬌歌搖短楫  
逢郎卻不語  
郎去轉眉蹙

黃閣一首

閣宇啟崇甫田人萬厯丙子舉人官永安知州

蘭陔詩話啟崇精翰事不爲形似自成一家

遊雙明洞

探蹟地靈古招提逸興開岩幽晴帶雨湍激水鳴雷落日麋  
猿嘯空山雲樹迴眼前無俗慮扶病一登臺

麥秀岐二首

秀岐字德徵南海人萬厯丙子舉人官萬年知縣有

澹遠堂稿

越王臺

黃屋何年易故宮荒塋登眺起悲風函關鹿走秦封割沛水



龍興漢使通城市萬家煙樹合江山千載霸圖空松杉不解  
滄桑事依舊寒原自鬱葱

鎮海樓

松濤滿壑散炎埃飛閣淩虛爽氣開滄海波光侵檻入白雲  
山色隔城來煙光寂寞呼鸞道古木蕭疏朝漢臺徙倚休裁  
王粲賦故園風景且銜杯

黃朝賓一首

朝賓字伯遷廣州順德人萬厯丙子舉人官長樂教諭  
論有山石洞稿

送陳山人讀書羅浮

四百峯高日月迴雲書從此謝氛埃遙分木客藤蘿幔更上

麻姑錦繡臺石曰曉春紅翠鳥名響玉笙宵奏鳳凰來澄心靜  
夜丹光裏七十璇房次第開